

Govor visokog predstavnika i specijalnog predstavnika EU za BiH, Christiana Schwarz-Schillinga na konferenciji za medije poslije završetka sastanka PIC-a

Zahvaljujem vam se na odzivu.

Upravni odbor Vijeća za implementaciju mira je upravo završio svoj sastanak i ubrzo ćemo izdati naš komunike u kojem ćemo izložiti ključne tačke naše diskusije.

Kao što sam ranije rekao diskusija je bila izuzetno korisna.

Glavna pitanja u diskusiji su bili tranzicija i program reformi, posebno onih reformi koje su neophodne za potpisivanje Sporazuma o stabilizaciji i pridruživanju sa Evropskom unijom.

Kao što vam je poznato ovo je bio zadnji sastanak Upravnog odbora Vijeća za implementaciju mira prije razgovora u februaru naredne godine kada će se politički direktorima sastati da bi još jednom razmotrili svoju odluku da zatvore Ured visokog predstavnika, kao što je planirano, u junu 2007. godine.

U revidiranju svoje odluke o zatvaranju OHR-a, politički direktori će pažljivo ocjenjivati situaciju kako u Bosni i Hercegovini tako i u regionu.

Lideri svih političkih stranaka, koje su zastupljene u

Parlamentarnoj skupštini Bosne i Hercegovine, su prisustvovali današnjem sastanku.

Politički direktori su im naglasili koliko je značajno stvaranje koalicija i formiranje vlasti i kako bi ispunili svoje odgovornosti prema građanima Bosne i Hercegovine, koji su ih izabrali, i kako bi mogli provesti reforme od ključnog značaja za Sporazum o stabilizaciji i pridruživanju sa Evropskom unijom.

Iako je prošlo više od dva mjeseca od izbora koji su održani 1. oktobra, tek se trebaju formirati vlasti na nivou države i Federacije, a proces reformi je blokiran.

Politički direktori su takođe apelirali na političke lidere Bosne i Hercegovine da se fokusiraju na ključne reforme koje su neophodne za Sporazum o stabilizaciji i pridruživanju, a posebno reformu policije, pošto će, kao što je to naglasila Evropska komisija, Komisija preporučiti zaključivanje ovog Sporazuma tek onda kada bude postojao sporazum o reformi policije.

Direkcija za restrukturiranje policije upravo završava svoj izvještaj.

Politički direktori vjeruju da prijedlozi koje je do sada dala Direkcija za reformu policije predstavljaju čvrstu osnovu za stvarnu i trajnu reformu policije u skladu sa tri načela Evropske unije.

Upravni odbor je pozvao na konstruktivne razgovore među političkim strankama da bi se omogućio rad Direkcije i usvajanje njenih prijedloga.

Politički direktori su čestitali Bosni i Hercegovini na pozivnici da se pridruži NATO-ovom programu Partnerstvo za mir. Politički direktori su takođe naglasili da članstvo u PfP-u sa sobom donosi dodatne obaveze i odgovornosti.

Vlasti Bosne i Hercegovine, posebno u Republici Srpskoj, moraju ispuniti svoje međunarodne i daytonske obaveze da u potpunosti surađuju sa Međunarodnim tribunalom za ratne zločine počinjene u bivšoj Jugoslaviji.

To znači da imaju proaktivnu ulogu u privođenju svih osoba koje su optužene za ratne zločine, posebno Radovana Karadžića i Ratka Mladića, te u razbijanju mreža podrške.

Razgovarali smo i o značaju ustavne reforme kojom bi ova zemlja dobila efikasnu strukturu koja bi omogućila da Bosna i Hercegovina donosi odluke neophodne za ispunjavanje zahtjeva euroatlantske integracije.

Upravni odbor i dalje podržava usvajanje prvog paketa ustavnih amandmana, koji su šest političkih stranaka dogovorile u martu, što prije. Taj paket predstavlja prvi pozitivan korak u dugotrajnjem procesu koji će pomoći Bosni i Hercegovini da ispuni zahtjeve koji proizilaze iz integracije u Evropu.

Upravni odbor je dao podršku i mom radu te radu Sjedinjenih Država na omogućavanju ustavnih reformi, te pozdravio opredijeljenje Evropske unije i Sjedinjenih Država da zajedno rade u pružanju podrške daljoj fazi ustavnih reformi.

Ako imate pitanja biće mi zadovoljstvo da odgovorim na njih.